



**PARLAMENTO
NACIONAL**
República Democrática de Timor-Leste
GABINETE DO PRESIDENTE

DISKURSU SUA EXSELÉNSIA SENHOR PREZIDENTE PARLAMENTU NASIONÁL

Dr. Aniceto Longuinhos Guterres Lopes

Iha okaziaun pose ba Prezidenti no Membros Comissão Nacional das Eleições

Excelentíssimo e Reverendíssimo

Dom Virgílio do Carmo da Silva, SDB, Arcebispo da Arquidiocese de Dili

Excelências,

Senhores Membros da Mesa Parlamento Nacional,

Senhores Chefes das Bancadas Parlamentares,

Senhores Chefes das Comissões Especializadas do Parlamento Nacional,

Senhores Deputados

Senhor Presidente do Tribunal de Recurso

Senhores Membros do Governo,

Senhora Provedora de Direitos Humanos e Justiça,

Senhor Comissário da Comissão Anti-Corrupção,

Senhor Comandante das F-FDTL, Tenente General Lere Anan Timur

Senhor Comandante Geral PNTL, Comissário Faustino da Costa

Senhor Chefe da Casa Civil,

Senhor Presidente do Conselho de Imprensa

Senhores Dirigentes e Quadros dos Partidos Políticos

Senhor Ex-Presidente da CNE,

Senhores Membros e Presidente da Comissão Nacional das Eleições

Senhor/a Representante do PNUD e Representantes das Missões Diplomáticas

Senhoras e Senhores Convidados,

Ba dala uluk hau hakarak hatoo hau nia parabens ba membros foun sira no ba Prezidenti eleitu Komisaun Nasional Eleisaun nian.

Iha demokrasia representativa eleisaun nudar momentu oportunu ba sidadun sira atu hatudu sira nia espetativa, sira nia opsaun politika no depozita sira nia konfiansa ba mak sé mak lidera Estado no asume poder politiku, no sé mak sai sira nia representante hodi representa povu tomak nia interese. Opsaun politika no konfiansa nebe sira hatudu mantein ho espetativa katak sei hetan retornu sosial, ekonomiku no politiku ba sidadaun hotu nia moris diak. Tanba ne'e, wainhira povu lakon nia vontade atu ba fo nia opsaun politika no depozita nia konfiansa, Estado hahu tama iha perigu lakon legitimidade. Wainhira povu lakon nia liberdade genuina tanba osan, tanba promesa falsu, tanba presaan ka falsifikasaun iha prosesu eleitoral no povu laiha konesimentu didiak no loloos ba sé mak nia atu espresa nia opsaun politika, Estado moris iha pseudo-demokrasia ka demokrasia falsu no eleisaun rezulta deit autocratas. Wainhira povu sei moris iha obskurantismu no opresaun iha formas oioin, liberdade laiha, nune'e mos laiha demokrasia. Wainhira povu hasoru forsa majou ruma nebe satan dalan ba espresa nia opsaun politika no depozita nia konfiansa, Estado liu husi nia orgaun kompetente sira tenki tetu no disidi alternativas viaveis no justa. Wainhira povu no partidu politiku sira la preparadu didiak no loloos hodi ba kompete iha eleisaun, Estado bele lakon nia soberania no nia poder politiku.

Nunee, mak eleisaun nudar mekanismu institusionalizada ida no nudar oportunidade organizada no estruturada, iha regime ka ordein demokrasia nian. Iha âmbito ida ne'e, mak orgaun eleitoral ezisti no funsiona hodi dinamiza demokrasia tuir prinsipius demokratikus hodi fó mos continuidade ba ukun iha Estado tomak. Ne'e duni ezistensia, kompozisaun no funcionamentu orgaun eleitoral sira tenki bazeia deit ba prinsipius profesionalismu, legalidade, integridade, imparcialidade no objetividade hodi garante no asegura nafatin kualidade demokrasia no kualidade husi rezultadu eleisaun. Prinsipiu hirak ne'e mak sai kriteriu esensial ba dirigenti no pesoal sira hotu nebe halao funsaun iha orgaun eleitoral sira. Se laos ho prinsipiu sira hanesan ne'e demokrasia sofre defisiensia no sofre paralizaun sistemika.

Senhoras no Senhores Conviddos

Iha kontekstus Estado de Direito Democrático de Timor-Leste ho nia orgnizasaun poder politiku, orgauns eleitoral nudar instrumentu atu garante sidadaun sira no partidu politiku ezerse sira nia direitu eleitoral ho justu. Nee duni regime juridiku sira nebe sustenta realizasaun demokrasia eleitoral tenki nakloke ba mudansas hodi fo dalan nafatin ba direitu no justisa eleitoral iha eleisaun sira. Resenseamentu eleitoral nudar prekondisaun indispensavel ida iha elisaun sira. Prekondisaun ida ne'e mak fo fundamentu legitimu ba eleisaun no nia rezultadu iha loraon ikus. Tanba importansia ida ne'e mak resenseamentu eleitoral tenki halao ho rigorozu, onestidade no transparensia.

Egizi nafatin artikulasaun diak kompetensias supervizaun CNE nian no kompetensias téknika administrasaun eleitoral STAE nian iha faze pre-eleisaun, eleisaun no pos-eleisaun. CNE halao nia funsaun nudar orgaun independenti husi kualker orgaun poder politiku nian. Lei atribui kompetensias ba entidades sira nebe kompoein estrutura CNE. Ema ida-idak nia disponibilidade ba asume funsaun hirak ne'e signifika, nia komprometidu ba prinsipius nebe aplika ba CNE tomak. Ida-idak halao nia kompetensias rasik nebe kompleta malu hodi lori susesu ba eleisaun no atingi rezultadu nebe justu no demokratiku.

Asuntu esensial seluk, mesmu la tama iha kompetensias orgaun eleitoral sira nian, maibe hau hakarak foti iha ne'e tanba relasiona ho eleisaun sira mak, registu no akreditasaun ba partidos polítikus tenki tuir prinsipius legalidade, legitimidade no tuir regime Estado de Direito Democrático, katak respeita no hakruk ba lei no ba prinsipius demokratikus no livre opsaun ba sidadaun sira. Kuadrus no dirigentes partidos politiku sira asume responsabilidade boot iha Estado de Direito Democrático hodi kontribui ba konsolidasaun soberania Estadu, kontribui ba dezvoltamentu país tomak no dignifika imagein Estadu ba mundu tomak. Wainhira partidu politiku laiha sensibilidade, laiha responsabilidade ba sidadaun hotu-hotu nia moris diak, la konese Estadu nia problemas, partidu ne'e lakon vinkulasaun ho Estadu no lakon nia forsa moral ba nia existensia iha Estado de Direito Democrático.

Povu presiza komunikaun politika, messagein politika nebe informativu, edukativu no pasifiku hodi forma nia opsaun politika. Iha eleisaun hirak liu ba Povu halo hela teste no kontesta rasik nia vontade no opsaun politika no dirige messagein ba lideres partidos politiku sira, figuras eminentes no ba gerasaun kontinuidora sira katak, komunikaun nudar elementu esensial iha nivel no kategoria hotu-hotu hodi aseguara kontinuidade

lideransa Estadu no governasaun nebe sustentavel no solidu. Buka malu no komunika ba malu ho haraik-an hodi konserta entendimentu kona ba interese nasional. Komunikasaun ka dialogo entre lideres partidu politiku sira, nudar etapa indispensavel ida depois hetan tiha rezultadu eleisaun hodi reforsa sentidu Estadu no materializa konfiansa nebe povu fo ba partidu sira, no orienta dezvoltamentu país nian ba atingi sidadaun hotu-hotu nia prosperidade.

Senhoras no Senhores Convidados

Eleisaun sira nebe sei halo husi ne'e ba oin, sei la hanesan ho eleisaun tinan hirak liu ba tanba, impaktu husi pandemia Covid-19. Durante periodu propagasaun Covid-19 iha mundu tomak país lobuk ida mak desidi adia sira nia kalendariu eleitoral. Iha por volta de 80 países no territóriu mak adia sira nia eleisaun tantu nasional no sub-nasional, desde Fevereiro 2020 too Jullu 2021¹.

Covid-19 impoen tan todan boot lobuk ida ba todan sira nebe eziste ona iha Timor-Leste nia esperiencias elisaun sira. Pandemia Covid-19 hamosu egizencias lobuk ida relasiona ho exercisio demokrasia ida ne'e. Estadu liu-liu orgaun eleitoral sira presiza hare no tetu didiak egizencia sira nebe lori implikasoens hanesan:

- Mudansa ba Lei eleisaun hodi konforma ho situasaun atual ka egizencia sira nebe Covid-19 impoen;
- Para alein de pesoal no ekipamentus eleisaun nian, presiza tan pesoal no ekipamentu saude nian tuir regime Covid-19 egizi;
- Presiza artikula diak liu tan koordenaun no kolaborasaun entre instituisaun no pesoal servisu sira iha terrenu;
- Alokasaun adisional finanseira no logistika;
- Garante nafatin pesoal hotu-hotu nebe halao servisu eleitoral atu labele lakon sira nia direitu ba votasaun;
- Presiza iha konsensu politiku ba kalendariu eleitoral;
- Presiza iha sensibilidade no responsabilidade ba ema ida-idak nia saude no saude publika;

¹ International Institute for Democracy and Electoral Assistance. International Foundation for Electoral Systems.

Desafio sira ne'e, fo hanoin dala ida tan mai ita hotu katak, situaun ka problema lobuk ida nebe Estadu hasoru, laos nesesariamente tenki trata ho politika poder ka ho argumentos politiku poder nian, maibe presiza loke espasu ba dialogu ho sensibilidade moral, ho virtude politika, tanba politika nia esensia laos poder absolutu, maibe mak moral, mak forsa moral.

Dala ida tan hau nia parabens, servisu ho diak no diak liu-tan hodi lori povu no partidos politikus Timor-Leste ba kompete ho virtude politika, ho dignu no ho dame hodi atingi rezultadu eleisaun nebe iha kualidade demokratika.

Tenho dito

Obrigado!